

novel 
comel



KISAH CUPCAKE MATA PANDA

Aja Fazla

Kisah Cupcake Mata Panda



Suasana riuh rendah dengan gelak tawa mereka yang berbual-bual. Itulah situasi lazim apabila tamat peperiksaan. Hanya segelintir yang tenang menghadap buku, bukan lagi buku pelajaran... tetapi kini bebas membaca novel ataupun komik kegemaran.

Nurul Saleha sibuk mencatat tempahan yang diterima sempena jamuan akhir tahun kelas. Setakat ini sudah ada lima kelas yang menempah dengannya. Dua set kek cawan *Red Velvet*, dua set kek cawan lobak dan satu set kek cawan vanilla. Nurul Saleha

Kisah Cupcake Mata Panda

tersenyum meleret, “Cukuplah buat lima set dan secara rasminya, tempahan ditutup,” bisiknya sendiri sambil mengerling ke arah sahabat-sahabat yang khusyuk menghadap novel di tangan.

“Seha!” sapa Widya yang muncul entah dari mana lalu menepuk bahu Nurul Saleha. Mentang-mentanglah cikgu sudah tidak masuk kelas, maka Widya mengambil kesempatan keluar sesuka hati.

“Apa?” Nurul Saleha mengangkat kening memandang rakannya tersengih-sengih dan menggerak-gerakkan badan gaya seperti orang hendak terkucil.

“Awak buat *cupcake* untuk jamuan kelas kita nanti?”

“Tidaklah. Saya bawa buah-buahan sahaja. Lagipun saya sudah buat *cupcake* Red

Velvet minggu lepas. Asyik makan kek cawan, mesti semua orang sudah bosan.”

“Jika begitu, biar saya yang bawa. Saya mahu buat *cupcake* ini. Comel, bukan? *Hmm...* boleh kita buat sama-sama?” Widya menghulurkan gambar kek cawan bermuka panda.

Tiba-tiba terdengar suara Jamal ketawa dari belakang. “Panda? Ya! Memang ada iras-iras spesies Widya,” ujar Jamal lalu pantas berlari pergi dan meninggalkan Widya mengetap bibir dan geram sendiri.

“Saya sudah ada banyak tempahan, kebetulan pada hari yang sama.”

“*Alah!* Kita buatlah sama-sama. Kita buat tempahan awak dan *cupcake* panda saya. Bolehlah... tolonglah...,” Widya merayu dan wajah Nurul Saleha ditatap seperti kucing menagih simpati.

Kisah Cupcake Mata Panda

“Edrina dan Umi pun datang menolong,” sambung Widya sambil menyinggung dua rakan-rakannya yang sedang membaca.

“*Hah? Apa?*” Edrina dan Umi yang tidak tahu pokok pangkal cerita, sudah serentak terkebil-kebil sama.

“Kita tolong Seha buat *cupcake* pada petang Khamis.”

“Boleh. Tetapi kami datang lewat sedikit. Hari Khamis ada perjumpaan Kelab Alam Sekitar.”

Widya kini memandang Nurul Saleha, menantikan jawapan.

“Baiklah... baiklah....”

“Yeay!” Widya bersorak gembira.

“Petang ini ikut saya beli bahan-bahan mentah ya?”



“Wah, beratnya! Boleh tercabut tangan saya.” Widya berkerut-kerut menahan beban yang dibawa.

“Bukankah tadi awak juga yang kata, manusia boleh mengangkat beban sehingga sekali ganda berat badannya sendiri. Ini belum sampai 10 kg, sudah mengeluh?” Nurul Saleha tersenyum sahaja mendengar keluhan rakannya.

Widya tersengih, itulah... sebentar tadi beria mendabik dada, kononnya mampu menghantar barang ke rumah Nurul Saleha.

“Seha, apa kata kita buat di rumah saya sahaja? Rumah saya lebih dekat berbanding

Kisah Cupcake Mata Panda

rumah awak yang perlu naik bas selama 20 minit. Sekiranya hantar ke rumah awak, rasanya belum sempat sampai... sudah tercabut tangan-tangan saya ini!”

Nurul Saleha terdiam. “Peralatan bagaimana? *Oven? Mixer?*”

“Tidak perlu risau, semua ada. Nanti kita semak ya?”

“Baiklah. Barang ini letak di rumah awak dahulu. Tetapi saya juga perlu minta izin pada ibu saya.”

Widya tersenyum dan mula melangkah menuju ke rumahnya.



“Baik! Kita mulakan sekarang!” Ucapan Widya penuh semangat apabila melihat

Nurul Saleha sudah datang dengan apron dan penutup kepala ala-ala *Masterchef*.

“Kita mahu buat apa dahulu?”

“Mula-mula kita semak bahan-bahan dan barang. Sebelum itu hidupkan oven, lihat ia berfungsi ataupun tidak.”

“Baik!” Widya pantas berlalu pergi menghidupkan oven.

“Kita hendak buat dua set *cupcake Red Velvet*, dua set *cupcake* lobak dan satu set *cupcake* vanila. Awak pula mahu buat kek apa?”

“Satu set *cupcake* panda untuk kelas kita. Dan dua set *cupcake* lobak untuk Cikgu Mahani.”

Nurul Saleha sedikit tersentak. “Bagaimana boleh ada tambahan dua set lagi? Hari itu janji satu sahaja?”

Kisah Cupcake Mata Panda

“Tiba-tiba sahaja Cikgu Mahani minta, bagaimana saya hendak menolaknya? Waktu itu pula, awak tiada di kelas dan hilang entah ke mana.”

Sekejap Nurul Saleha mengusap wajahnya yang berkerut susah hati. “Mengapa tidak beritahu awal-awal? Bahan-bahan ini tidak cukup untuk membuat dua lagi set *cupcake*. Lagipun lobak pun saya beli cukup-cukup sahaja.”

Widya tersengih seperti kerang busuk. “Kita belilah lagi, lagipun kedai dekat sahaja. Mujurlah buat di rumah saya, jadi senang mahu ke kedai. Bayangkan sekiranya buat di rumah awak... mesti haru dibuatnya!”

Nurul Saleha menarik nafas dalam-dalam, tetapi akhirnya mengangguk setuju juga. “Itu sahaja? Tiada tambahan lain?”

“Ya, itu sahaja.”

“Baik, kita buat *cupcake* vanila dahulu... selepas itu kita ke kedai lagi.”

“*Hmm...* apa kata awak seorang sahaja pergi ke kedai. Biar saya yang buat *cupcake* vanila. Lagipun ia senang sahaja.”

“Betul awak boleh buat?” Nurul Saleha memandang Widya bersama kerutan di dahi.

“Betul! Lagipun tempoh hari saya sudah lihat cara awak buat *cupcake* vanila. Ia *cupcake* paling senang hendak dibuat.” Ucapan Widya kedengaran penuh yakin. Sememangnya tempoh hari, selepas Nurul Saleha memenangi pertandingan membuat *cupcake* di Sekolah Sri Bangsar... guru subjek Kemahiran Hidup menganjurkan bengkel memasak dan Nurul Saleha dilantik menjadi mentor pada semua.

Kisah Cupcake Mata Panda

“Baiklah. Jika begitu, saya pergi ke kedai dahulu ya?”

“Hati-hati di jalan raya!” Widya melambai ke arah Nurul Saleha sebelum mengunci pintu. “Ini Widya, jika setakat buat *cupcake*...memang senang sangat! Campak-campak pun jadilah!”



Sebaik sahaja pintu dibuka, bau harum *cupcake* vanila menyerbu masuk ke lubang hidung Umi dan Edrina.

“Amboi! Sedapnya bau!” Umi menghidu-hidu sebaik memasuki rumah Widya.

“Eh? Mana Seha? Awak buat semuanya sendirian?” Edrina pula menegur sebaik memasuki ruang dapur.

“Mengapa? Tidak percaya? Ini Widyalah!” Widya menepuk dada dan tersenyum senang kerana tugasannya membuat *cupcake* vanila sudah selesai.

Kini loceng oven pun berbunyi dan masing-masing mengintai ke kaca oven. Tidak sabar mahu melihat hasil *cupcake* yang dibuat oleh Widya.

“Wah, cantiknya! Kembang, bulat dan harum.”

“Awak memang ada bakatlah, Widya!”

Widya tersenyum dengan hidung terkembang kempis kerana menerima pujian yang melambung-lambung. Kini pintu oven dibuka dan *cupcake* yang panas diletak di atas meja. Namun, sebaik berada dalam keadaan suhu bilik dan *cupcake* itu menyejuk... tiba-tiba kek itu mengecut dan hilang dari pandangan mata!

Kisah Cupcake Mata Panda

Widya menjerit dan membuntang memerhati perubahan drastik pada keknya, “*Cupcake... cupcake saya!*”

Nurul Saleha yang baru sampai dari kedai, segera mendekati tiga sekawan. Widya masih terbeliak memandang *cupcake* yang tadinya mengembung... kini mengempis. Kelihatan isinya kurang dari suku kertas cawan dan mengempis seperti belon yang bocor. Kini Widya terkaku seperti patung.

“Mengapa jadi begini?” Edrina terpinga-pinga.

“Widya, awak ikut resepi yang mana?” Umi turut berkerut kening.

“Saya ikut resepi yang Seha ajarlah!” Jawapan Widya dituturkan dengan suara hampir menangis. Laju Nurul Saleha meneliti resepi *cupcake* vanilla itu. Tiada apa yang aneh dan semuanya mengikut sukatan.

Namun hasilnya tidak menjadi. Malah kek itu pelik sekali. Kebiasaannya, kek menjadi keras atau tidak naik... bukannya hilang sehingga ke dasar.

Tiba-tiba Nurul Saleha ketawa. Umi dan Edrina memandang ke arah Nurul Saleha dengan pandangan terpelik-pelik. “Kenapa?”

Dalam ketawa, Nurul Saleha mengangkat beg plastik yang berbaki separuh. Widya lekas mendekati Nurul Saleha dan mengerut dahi.

Nurul Saleha ketawa lagi sambil tergeleng kepala tidak henti.

“Kenapa?” Widya masih tidak faham, mengapa reaksi kawannya jadi begitu sekali.

Kisah Cupcake Mata Panda

“Cupcake ini kempis, hilang dan mendatar sebab tiada tepung.” Kata Nurul Saleha.

“Ini gula ising bukan tepung,” tambah Nurul Saleha sambil menghulurkan plastik itu.

“Hah!” Widya berwajah melopong. Mungkin kerana terlalu berkeyakinan, dia tidak dapat membezakan antara tepung dan gula ising. Kedua-duanya berdebu dan berwarna putih. Habis, *cupcake* vanila tidak menjadi!



“Widya, mana pewarna merah?”

Pantas gadis itu membuka kabinet yang tersusun pelbagai barang. “Nah!” Widya menghulur botol yang mengandungi debu merah.

“Ini memang pewarna? *Hmm...* kenapa warnanya tidak berapa merah?” Nurul Saleha berkerut semacam. Biasanya dia menggunakan pewarna gel, ini pewarna lain pula yang dihulurkan.

“Betul! Emak saya gunakan pewarna ini untuk buat pulut semalam.” Jawapan Widya disertakan dengan tindakan membuka peti sejuk, lantas mengeluarkan bekas pulut yang diperkatakan.

“Merah, bukan?” Memang benar, pulut itu berwarna merah menyala. Nurul Saleha menganggu lalu tanpa banyak perkiraan... menyukat dan mencampurkan pewarna merah bersama serbuk coklat. Sesudah adunan dimasukan ke dalam oven, Umi tiba dengan wajah yang masih berkesan dengan air wuduk.

Kisah Cupcake Mata Panda

“Umi, saya baru masukkan kek cawan *red velvet* ke dalam oven. Awak tolong perhatikan ya? Saya mahu solat pula.”

Umi mengangguk lalu mencapai plastik yang berisi lobak merah. Kulit lobak itu perlu dikupas sebelum disagat.

“Widya! Pengupas kulit ada di mana?” Umi berpaling memandang Widya yang sedang mencuci perkakas.

“Ada dalam laci nombor tiga,” jawapan Widya disertakan dengan menunjuk menggunakan jarinya yang penuh bebuih sabun. Kemudian mulut pula bertanya meminta kepastian, “Lepas ini kita buat *cupcake* lobak pula ya?”

“Ya, tetapi awak belum solat lagi. Pergi solat dahulu, masa sudah hampir pukul 7.00 petang.”

“Jika begitu, saya pergi dahululah,” Widya segera meninggalkan basuhan dan menuju ke bilik solat.

Pada masa yang sama, Umi dan Edrina bertindak menyiapkan bahan-bahan untuk *cupcake* lobak merah berdasarkan resepi yang dibawa oleh Nurul Saleha. Sambil itu, mereka memantau kek cawan yang sedang dimasak di dalam oven. Sebaik sahaja loceng berbunyi, Umi memeriksa dengan mencucuk sebiji kek cawan menggunakan lidi. Sebaik melihat lidi bersih, semua kek cawan yang berada di dalam oven dikeluarkan. Tidak perlu mencuba setiap satu.

“*Hmm...* kenapa warna kek cawan ini pelik?” tanya Nurul Saleha yang baru selesai menunaikan solat Asar.

“Saya pun baru hendak tanya. Ini *cupcake red velvet* atau bukan? Baunya juga sedikit

Kisah Cupcake Mata Panda

pelik dan lain macam!” Umi kini merenung hasil kek itu.

“Yalah! Sepatutnya warna merah, tetapi kali ini warnanya jadi coklat keperangan.” Edrina turut memberitahu pemerhatiannya.

“Warnanya jadi pelik kerana menggunakan pewarna serbuk milik emak Widya.” Nurul Saleha segera menuju ke arah botol pewarna yang digunakan dan menyerahkan kepada Umi. Umi pula membelek botol yang tidak berlabel, lalu dibuka dan dihidu.

“Eh? Ini serbuk lada!” Meninggi suara Umi menjauhkan botol dari hidungnya bagi menahan bersin. Nurul Saleha panik mencapai botol di tangan rakannya dan cuba meniru langkah menghidu sama.

Beberapa saat kemudian, hidung Nurul Saleha bagai dicucuk dan matanya mengecil “*Hachum!* Aduhai... sah ini memang serbuk lada!”

“Mengapa Widya kata emaknya menggunakan pewarna merah ini untuk mewarna pulut,” Nurul Saleha menggaru kepala yang tidak gatal, malah mengeluarkan pulut yang ditunjuk Widya.

“Pulut ini memang guna pewarna merah. Rasanya Widya yang salah beri pewarna.”

“Aduh! Hari sudah menjelang maghrib... satu *cupcake* pun tidak siap lagi,” keluhan Nurul Saleha benar-benar mendesah.

“*Eh!* Mengapa sudah berhenti membakar?” Widya yang baru tiba, berkerut pelik. Ada dua dulang lagi yang sepatutnya dimasukkan ke dalam oven, kini terlihat dibiarkan sahaja

Kisah Cupcake Mata Panda

di atas meja. Umi, Edrina dan Nurul Saleha memandang sesama sendiri.

“Kita buat selepas solat maghriblah,” jawab Nurul Saleha lesu. Widya mengerutkan dahi apabila melihat tingkah Nurul Saleha. Hanya perlu masukkan acuan kek ke dalam oven, mengapa perlu tunggu selepas maghrib?

“Baiklah, jika begitu kita buat pesanan makan malam dahulu. Lepas solat dan makan, kita sambung kerja.” Widya cuba memeriahkan kembali suasana. “*Haa...* kawan-kawan mahu makan apa?” Widya kini memandang sahabat-sahabatnya.

“Apa-apalah,” jawab Nurul Saleha dengan perlahan.

“Saya pun ikut sahaja apa yang ada,” jawab Umi dengan nada yang sama lemah.

“Baiklah, jika begitu... saya pergi ke kedai sekejap.” Widya laju mencapai tudung dan beg duitnya.

“Widya, sebelum pergi... awak rasalah kek *red velvet* ini.” Edrina tiba-tiba menatang sebiji kek dan tersenyum licik lalu berkata, “*Nah*, makanlah dahulu.”

“*Wah!* Kita sudah boleh rasa? Cukupkah untuk pesanan dan tempahan nanti?”

“Cukup sebab kek ini memang khas buat awak,” Edrina membalas sambil menjeling ke arah Nurul Saleha yang sedang monyok. Nurul Saleha kini mengangkat muka, bersedia memandang Widya yang sudah menyumbat kek cawan ke dalam mulut. Mulutnya dinganga seluas mungkin bagi memasukkan kek cawan itu dengan sekali sumbatan. Widya memang begitu, agak gelojoh apabila tiba soal makan.

Kisah Cupcake Mata Panda

Sekali kunyah, dua kali kunyah, tiga kali kunyah, empat kali kunyah...

“Woi! Ini kek apa?” Belum sempat soalan itu dijawab, Widya sudah berlari ke sinki lalu meluahkan segala isi kunyahan. Mulutnya juga segera dilalukan dengan air pili yang mengalir deras! Nurul Saleha tersenyum, Umi menahan ketawa.

“Bagaimana? Sedap kek cawan terbaru kita?” tanya Edrina dengan kening terjongket-jongket.

“Itu kek cawan baru? Mengapa perisanya pelik? Mula-mula rasa macam sedap, lepas itu naik berasap telinga saya. Kek apa itu?” Widya berkerut memandang Nurul Saleha yang tersengih.

“Itulah kek cawan *Red Chili Velvet*,” jelas Nurul Saleha bersama tangan yang

meliuk-liuk ala diva dalam rancangan muzik MTV.

“Mana datangnya cili itu? Bukankah kita mahu buat kek cawan *Red Velvet*?” Widya menyoal lagi. Mukanya kelihatan seperti orang keliru. Beberapa kali turut meneguk air hingga gelas yang dipegang menjadi kosong.

Nurul Saleha melepaskan keluhan, “Pewarna yang awak beri, menyebabkan ia jadi pedas!”

“Itu serbuk cili... bukan pewarna merah!” Umi turut memberitahu situasi sebenar.

Widya membeliak mata dan mungkin kerana tidak percaya, laju membuka botol serbuk merah... lalu menciumnya. “*Hachum! Hachum! Hachum!*”

Sahabat lain ketawa melihatnya!

Kisah Cupcake Mata Panda



Jam menunjukkan hampir pukul 1.30 pagi. Widya kini memasukkan dulang terakhir iaitu kek cawan panda. Kek cawan ini adalah olahan daripada resepi kek cawan vanilla yang dicampur dengan biskut OREO hancur.

“Yeay! Kek cawan terakhir!” sorak Widya yang ditugaskan membakar kek cawan dan mencuci pekakas. Adunan kini hanya dibuat oleh Nurul Saleha dan Umi. Mereka tidak mahu kesilapan demi kesilapan berulang lagi. Umi dan Nurul Saleha yang sedang menyediakan ising vanilla dan krim keju, jadi tersenyum memandang Widya yang menari-nari di hadapan oven.

“Jika kita tidak buat silap tadi, tentu sekarang ini kita boleh menonton filem

ataupun tidur,” kata Edrina yang ditugaskan menyapu krim keju.

“Oh, sedapnya dapat tidur,” sambung Nurul Saleha sambil menggeliatkan badannya yang keletihan.

“Ya! Ya! Saya faham... semuanya salah saya,” Widya sudah memuncungkan bibir.

“Memang pun! Mujur saya ada beli pewarna merah di kedai, jika tidak....”

“Makan *cupcake Red Chili Velvet* jawabnya kita.” sambung Edrina sambil ketawa. Waktu itu, muncung bibir Widya semakin panjang, bagai boleh diikat reben hadiah Krismas!



Kisah Cupcake Mata Panda

Semua *cupcake* yang dipesan sudah diagihkan kepada pemiliknya. Sesekali Nurul Saleha menguap menahan kantuk dan matanya juga kelihatan sedikit tidak bermaya. Hampir jam 4.00 pagi, kerja-kerja menyiapkan tempahan kek cawan serta mengemas akhirnya selesai juga.

Kini Nurul Saleha melangkah masuk ke dalam kelas yang sibuk dengan kerja-kerja menyusun meja dan bangku sebagai persediaan jamuan akhir tahun. Widya belum tiba lagi, Edrina dan Umi pula sudah hilang entah ke mana. Pada ketika itu, kelas sudah dihias cantik dengan reben kertas dan belon berwarna-warni. Meja untuk makanan dan minuman juga sudah dialas dengan alas meja yang cantik. Semestinya, ia hasil kerjasama semua rakan-rakan sekelas.

“Seha, awak bawa apa?” tanya Mala sebagai salah seorang AJK penyediaan makanan.

“Kali ini saya bawa buah tembikai.” Nurul Saleha tersenyum mesra.

“Saya fikir awak akan buat *cupcake* seperti selalu,” kata Mala lagi.

“Alah... mesti semua orang sudah jemu kerana sentiasa makan *cupcake* buatan saya. Kali ini, biar semua orang rasa pula *cupcake* buatan Widya.” Jawab Nurul Saleha sambil tersenyum lagi.

“Tetapi mana Widya? Mengapa tidak sampai-sampai lagi?” Mala memerhati segenap kelas. Memang Widya belum datang dan tidak nampak langsung batang hidung.

“Mungkin sebentar lagi dia sampai.”

“*Hah!* Cari saya ya?” sergah Widya tiba-tiba.

Kisah Cupcake Mala Panda

“Eh? Awak kenapa, Widya? Kenapa muka sudah seperti beruang panda?” tanya Mala sambil memerhati rakan sekelasnya dari atas ke bawah.

“Gara-gara benda inilah... saya tidak tidur dari semalam,” jawab Widya sambil menyerahkan kotak kek pada Mala.

“Apalah yang dahsyat sangat... sampai tidak boleh tidur?” Mala menggeleng kepala lalu beredar kerana namanya dipanggil oleh AJK persiapan yang lain.

“Eh? Semalam awak tidak tidur langsung?” Nurul Saleha berkerut dahi. Setahunya, mereka masuk tidur pukul 4.00 pagi dan bangun pada pukul 6.30 pagi. Semasa meninggalkan rumah Widya, gadis itu masih bergolek di atas katil.

“Saya tidak boleh tidur! Puas bergolek kiri dan kanan.. tetapi tetap gagal mahu tidur.

Orang lain pula... sedap sahaja tidur lena, siap berdengkur lagi! Bertambah susahlah saya mahu tidur sebab bising,” bebel Widya tidak puas hati.

Kini Widya memerhatikan pasukan menyediakan makanan, menyusun segala hidangan di atas meja. Meja dihias cantik dengan hiasan-hiasan tambahan. Peralatan seperti pinggan dan dulang juga sangat menarik dan comel. Buah tembikai yang dibawa sudah siap berpotong disusun di atas rak bertingkat. Rak bertingkat itu ada tiga unit dan disusun sepanjang atas meja. Setiap tingkat terdapat buah yang berlainan... menjadikan ia sungguh meriah dengan warna-warna buah yang berbeza.

Nurul Saleha turut kagum dengan cara persembahan di atas meja hidangan. Indahnyanya seperti yang dilihat di dalam majalah dan di internet. Ada juga *macaroon*

Kisah Cupcake Mata Panda

pelbagai warna yang diletak di dalam balang kaca bulat. Biskut, gula-gula, coklat *fondue*, kek pop, dan *brownies* turut disusun kemas pada bekas yang sesuai. Setiap hidangan ada penanda nama masing-masing yang siap dicetak cantik.

“Ini saya tahu siapa punya... oh... memang sepadan dengan tuannya!”

Tiba-tiba Jamal bersuara dengan kuat. Semua rakan-rakan sekelas tertumpu ke arah Jamal yang sedang memerhatikan *cupcake* disusun di atas rak bertingkat. Umi dan Edrina yang selesai menjemput guru-guru dan baru masuk kelas, turut mendekati Jamal bagi mengetahui apa yang berlaku.

“Lihatlah, sama sungguh... memang sama sangat!” Jamal kini memadankan kek cawan di tangannya pada muka Widya. Widya yang marah, segera berlari mengejar pelajar lelaki yang mengusiknya!

Aja Fazla

Berangnya Widya, membuatkan bibir gadis itu diketap-ketap dan matanya dijegilkan luas-luas. Maka semakin terserlahlah rupa beruang panda pada wajah Widya!

Nurul Saleha, Umi dan Edrina ketawa besar!

@TAMAT@



Kisah Cupcake Mata Panda



Lebih banyak cerita
mengenai Nurul
Saleha dalam
Projek Cupcake
Ain Maisarah

MAHU DAPATKAN BUKU BLINK?



**SILA WHATSAPP
NOMBOR TELEFON INI :
0193365205
(WHATSAPP SAHAJA)**